

TIHTUJ

Wargahng Agweed Poale Yihr Tiihtuj

Rob Ke Nying Warga

Tiihtuj anahg dhaano acielo keew yaa padh Judea naa adoohng ne ngad yiiho gihr Kriihjto maa adoohng ne ngad tiih ke Poal kede a ngad konye yi tiih nyaay lum Juog. Poal warga gihn agweede ke yihr Tiihtuj ngaa na kony ngo yi piny Kread. Anaa wii kun nu ne maany tiih akuud gihr yaa yiiho. Warga rubo kaa nying nyepinye adahg me teeg.

Mar umodho rubo kaa nying ka beehn yaa wong maalo yi akuud gihr yaa yiiho ubeehd gene kii ngo adoohng ne ke romo ke beehdo ke dhe yooh me raaj yi thoohdh yaa Kread. Riown gen rob ka puohny Tiihtuje teehng nyoge me thoohdh yi wod Juog, cuow me doonge maahn me doonge (ge udo ne puohny nyetheamaahn), yaa rihj kede a baahng. Gug gen Poal toohn Tiihtuj ka nying ka beehdo gihr yaa yiiho, adoohng doohr ke rog kede a mag gom, maa wii akwahdho kede a peehm kede a paahng kiin nyoge yi akuud yaa yiiho.

Kaa Acaan Luube

Lum umodho 1:1-4

Yaa tiih yi wod Juog 1:5-16

Tiih kwaad teehng yaa wod Juog 2:1-15

Toohn nyoge 3:1-11

Gug lubo 3:12-15

1 ¹ A Poal ubaahng Juog e gihn gweehd yihri. Jeacuu e naa aohr an ne kahl Ciig Beer yihr yaa akwany Juoge ne yaae. Ateed Jeacuu kejea konya yaa akwany Juoge kede a unyoadha adiehj weehg gen beehdo ke dhe yoohn Juog. ² Adiehj ngo beehda gaahno gihro ge gaahno kuowo me guge tooro naa anaa aceg Juoge kea ngo ucube. Ngo aceg ke coon e wiih piny kuu acag, kede a Juog be rubo ke toohd. ³ Ciig nu ngo anyoadh Juoge awaahn ni kaa yoohn Ciig Beer ge acube yi cinga. Ge e giih puohnya bang gihn Juog ngaa boadh nyoge e naa ateed ngo kejea puohnya gen.

⁴ Yih Tiihtuj, yih niida wa nyethiina naa anyuola ke nying gihn nahgo yaa ayiiho.

Beehn Juog Wuure kede a Jeacuu Kriihjto Ruohdh cub gene muuny mar gen kede a doohr mar gen yihri.

Kar Kwany Yaa Doonge

⁵ E naa gihn awiia yihn yi Kread, bange ne cohg giih adoohng e ge poohd kuu athum ke tiihyo. Kede a ne kwany jo doong yaa ayiiho me tiihyo yi akuud yaa ayiiho kede a ke yihdh miehr wa kaa aroba ngo yihri. ⁶ Ngaa kwany ne ngaa me duohng nahge ngaa me beer me gihn me raaj be rob ke nyinge, kede a nahge ngaa maa anyuom dhaago acielo cog. Nyethene thiow nahg gene yaa ayiiho. Giih me reje wa giih bad maa dhaahl ge keá tiih gene ne weey weey kede a nahg gene yaa wuohdo. ⁷ Ngaa me duohng nyum nyoge yi tiih akuud yaa yiiho, nahge ngaa me ree tooro awuohj, bang gihn ngo tiih tiih Juog, kede a padh ngad nyaam, e padh ngaa me cwihnye be cuung ke rahnyo, me be nyaar liny. Ngaa me be nyaar muohl ke koongo. Ngaa me cwihnye keá cubo yi daahd giih lonyo. ⁸ Ngo beehda ngaa maa ngad wad, maa ngad muuj kede a me nyaar nyoge. Ngo beehda ngaa me nyaar tiih gihn me beer kede a ree wuore wuoro. Ngo beehda ngaa me beehdo ne kew, kede a ree koare koaro. ⁹ Ngaa me duohng nyum yaa ayiiho beehda ngaa maa amag lum Juog teeg mee ke cwihnye cang wa ka puohnye, noono e lum Juog cohge kii cwihny nyoge kede a unyoadhe kaa awaahj yaa akweer ke lum Juog.

Jaahy Yaa Puohny Giih Ucahb

¹⁰ Ngaa duohng akuud yaa ayiiho dhiil beero bang gihn nyoge me thoohdh kiin yaa ayiiho ge apaahr oogo yi lum Juog, noono e nyoge dwaahng gene dwaahng e ge rob giih me gihr nying gen tooro, adoohng yaa koohbo kob gene yaa padh Judea thoam gen nea lum Juog ayiih gene. ¹¹ Yaa nu, ge dhiil kaa cuowo bang gihn ge beehda nyoge me raany wudh yaa ayiiho ke bang yihdh miehr ke puohny gen noono. Nyoge ge puohny gene kaa giih toohd bang ukoog gen ke ngiihny. ¹² Ngad gen ke ngude me cuohn gene naa agamloohngjuog ngo anaa arobe coon kea, "Wu yaa Kread, wu beehda yaa toohd, wu yaa alyaaahb, me thow yi cam wa gihr alwango." ¹³ Lum nu ateede nu ngo adiehr. Nea maano, kea teed ngo yihr gen kejea gihn tiih gene ngo raaj. Cay gen beere lum Juog yiih gene yiiho beer mee keehdo. ¹⁴ Kede a wii gene giih Judea naa acoon piny kede a luub nyoge maa now me be daahd adiehj lum Juog ke yiiho. ¹⁵ Ngaa be rom cwihnye ke dwaahng yihdh giih anyoohne, gihn me rom anyoohne ke kahl ree tooro keew giih ne buude, abea kwaad nyepiny cang anyoohne rome kaa kahl rog yaa be yiih lum Juog bang wudh ge arahnyo. ¹⁶ Yaa nu ge urubo kejea Juog ngahy gene, abea ge tiih giih me mahn Juoge. Toohd now, ge nyoge me reje maa awaadh kede a ge yaa dhahl Juog. Gihn me beer me rom gene ke tiihyo tooro.

Puohny Lum Juog Maa Athiir

2 ¹ Abea yihn, puohny yaa ayiiho ke puohny maa athiir. ² Puohny yaa doonge unahg gene nyoge me wudh gen kwel, kede a cwihny gen nud. Ge dhiil nahg nyoge me yihr gen ne nyaaro me teeg, maa ge ayiiho, kede a unahg gene nyoge me guum luube, nyoge me wuor rog gen.

1:1-3 Ngad oohr: 1Tim 2:7 **1:2** 1Pii 1:3-5; Gal 3:6, 17-18 **1:3** 3:4; Awaahn ni: 1Tim 2:6 **1:4** Tiihtuj: 2Kor 2:13; Waahd: 1Tim 1:2

1:5 Tiih 14:23 **1:6-9** 1Tim 3:2-7; 1Pii 5:1-4 **1:9** 2:1; 1Tim 1:10 **1:10-16** 3:9-11; 1Tim 1:3-7 **1:10** 1Tim 1:6

1:11 1Tim 6:5; 2Tim 3:6 **1:13** 2Tim 4:2 **1:14** 3:9; 1Tim 1:14 **1:15** 1Tim 1:5; Mat 15:11; Rom 14:14, 20 **1:16** 2Tim 3:5; 1Jon 2:4

2:1-9 Epi 5:21-6:9 **2:1** 1Tim 1:10 **2:2** 1Kor 13:13

³Puohny maahn doonge thiw ke dhe yoohn beehdo me beer. Dhe yoohn maahn maa acub cwihny gen yi tihiy Juog. Rog gen keá yug gene ne yaa waaj, wale yaa nhyaar muohl ke kuong keraahyo. Puohny gene gihn me beer yihr nyoge cang. ⁴Noono arumo unyoadh gene kaa anhyaar maahn thene cuow gen kedea nyethen. ⁵Puohny gene maahn thene unahg gene maahn me rog gen koar gene koaro, kedea me nying gen be ne kal kal kedea miehy gen mag gene maa. Nahg gene nyoge me nhyaar tihiy gihn me beer kedea uwuor gene cuow gen. Neehn maano, e ngaa muu udhahl puohny gihro, wo yaa ayiih lum Juog, ngo uotooro.

⁶Ke yoohn nu acielo thiw, robi yihr yaa rihj unahg gene nyoge me cwihny gen nud. ⁷Abea gihn me kaal wudh gihi nu cang, nyoadh rihi yihr nyoge, ne ngad tihiy gihi beeye. Kedea yi puohny gihri noono, nyoadh rihi ne ngaa me rob gihi me doonge maa adiehr. ⁸Kedea robi kaa adiehr yihr nyoge ubahng gihn robi be dhaahr. Ne maano, e ngaa me maan yihh wiihe ulaahy bang gihn gihn me raaj maa gihr toohd me yoade rogo tooro.

⁹Rubi thiw yihr baahng uwuor gene ruohdhe gihi gen beere cwihny umihno rog gen. Ge keá peehmo. ¹⁰Ge keá kwahdo, abea nyoadh gene rog gen ne nyoge me beer maa ayiih lum Juog. Tihiy baahng ke gihn me beer cog beere lum Juog wiih ngo moar gene moaro ke nying tihiy gen noono beer nu.

Dhe Yoohn Beehd Yaa Akuud

¹¹Bang gihn Juog muuny gihre anyoadhe beere nyoge cang boadh wahy yoad gene yoado. ¹²Muuny Juog wo meehge ke kweer ke gihi me be daahd Juoge kedea gihi meehg adhemuohme cwihnyo yuohd rog gen. Muuny Juog wo yuge yugo ne nyoge me cwihny nud, maa abiohgrwaale kedea me beehdo ke dhe yoohn daahd Juoge. ¹³E wo ugaahno kedea e wo koar Cahng Lug. Cahng uniid teeg Juog kedea ka uduu Jeacuu Kriihjto Ngad Boadh won. ¹⁴Jeacuu athow ke nyingo ne lwahg won oogo yi cing gihn me raaj kedea ne wuuny awuohje gihi oogo. Noono e naa kaa adoohngo ne nyoge maa joe me nhyaar yug gihi me beeye.

¹⁵Rob gihi nu cang yihr nyoge. Yihri ne tee kedea tihiy keehd teeg nu ne meehg cwihny nyoge ngahmo kedea ne cay gen nea ge awuohj. Rihi keá meehg dhahlo yihr nyoge, rubi ke rob ngaa me duohng.

Yoohn Beehd Me beer

3 ¹Teed ngo yihr yaai gihi ayiiho uyug gene gihi ni: yihi gene loohng yaa mag paajo, kedea wuor gene thuy akuumo. Kony gene thuy akuumo utiihy gene gihn me beer. ²Kedea ge keá rubo ke gihn me raaj rih dhaano utaahngo. Abea mag gene gom ke nyoge kedea nyoadh gene beehd beer.

³Coon wo anahg abeehle me gihn maa angahyo tooro. E thiw, wo na nahg yaa dhaahl kedea wo na nahg nyoge maa leel yi gihn me raaj. Wo na nahg baahng yihr gihi me thoohd me be daahd Juoge kedea gihi meehg adhemuohme cwihnyo yuohd rog gen. Wo na yug gihi me reje kedea wo anahg yaa juunho me nhyaar tihiy gihn me raaj rog nyoge mooge. Nyoge na maano maano kedea wo na ke maano tiehd. ⁴Abea Juog Ngad Boadh won, wo aboadhe naa anyoadhe beeye bang gihn ngo beehda ngaa me nhyaar nyoge cang. ⁵Wo keá boadh kaa nying gihn me beer maa ayugo yihre, abea wo aboadhe bang gihn yea angeer ke nyingo. Wo aboadhe naa aluoge won ke pihi luogwahy kedea wo aboadhe ke dhe yoohn Wahy Juog ngaa cub kuowo me nyaahn yihro. ⁶Juog muuny ge beehda Wahy Juog ngo awiie yihr Jeacuu Kriihjto Ngad Boadh won, beere Jeacuu utiihyo ke kar wiihe nea Wahy Juog cub cubo yihro. ⁷Bang gihn wo anhyaar Juoge keraahyo, e naa awiie Wahy Juog piny yihr Jeacuu beere kiino ne beehdo me beer keehd Juog, kedea beere kuowo gihn nyaahn e be gug yoado yoado. ⁸A daahd yihh ucubi wiihi rog gihi ni beer mee, beere yaa ayiih lum Juog cwihny gen cub gene ne tihiy gihi beeye ge kony nyoge cang.

Lum Arob Poale Yihr Tihtuj

⁹Gihi nu ge gihi me kony nyoge cang. Wii peehm ke nying gihi me ne bihdh, wii loab tien wad me baahr me guge tooro, gihn me kony gene tooro. ¹⁰Nea ngaa rubo ke rob me paahng yihd nyoge kea cuow ngo tiel ariow cog. Nea dahg gen bere bero, kea nyiig oogo buude. ¹¹Ngahy ngo kejea kwaad ngaan nu yooh maa adiehr ngo awiie kedea adoohng ne ngaa me yug gihi me reje. Ngaa maa akihm gihi reje ge tihiye.

Gihi Me Be Wul Yi Wihj

¹²Artihmaaj wale Tiichuj ngo uohra yihri. Nea dhaano acielo kiin gen ngo awahnho, e kea laar tieni ke tihngo uroohmo yi geen Nikopolij, bang gihn a daahd unahga ruudo gihr wong kun ca. ¹³Kony Jenaj ngaa apuohny keehd gihi yi loohng kedea Apolo beere ge rom thubo ke weel gihr gen. Gwiir gihi gen ne daahd gene cang. ¹⁴Puohny yaa uyug gene rog gen ne nyoge me beeye. Nyoge me yoad gihi daahd gene kaa kwahg me padh yaa nyaahbo. Yug gene gihi beeye, ubahng wudh gen be cub gene yihd gihi me padh.

¹⁵Yih amaahdh wane cang, an maa yaa banga kan. Teed ngo yihr yaa ayiih lum Juog yaa nhyaar won, kejea ge amaahdh wane thiw. Muuny Juog beehde ke won.